

**Arfersiorfiup ukiukkut qimussimik tuttunniarfiusalernissaa siunertaralugu Naalakkersuisut peqquneqarnissaannik Inatsisartut aalajangiffigisassaattut siunnersuut. Piffissaq ukiukkut piniarfiusoq tamaat isigalugu, sumiiffiup siunnersuutigineqartup qanitaani nalunaarutip atuuttup aalajangersagai assigalugit suliaqartoqassaaq.**  
(Inatsisartunut Ilaasortaq Kristian Jeremiassen, Inuit Ataqatigiit)

### **Akissuteqaat**

(Aalisarnermut Piniarnermullu Naalakkersuisoq)

### **Siullermeerneqarnera**

Arfersiorfiup ukiukkut qimussimik tuttunniarfiusalernissaa siunertaralugu Naalakkersuisut peqquneqarnissaannik Kristian Jeremiassenip, Inuit Ataqatigiit inatsisartut aalajangiiffigisassatut siunnersuummik saqqummiussaqaarneranut Naalakkersuisut qujapput. Piffissaq ukiukkut piniarfiusoq tamaat isigalugu, sumiiffiup siunnersuutigineqartup qanitaani nalunaarutip atuuttup aalajangersagai assigalugit suliaqartoqassasoq ilaatigut siunnersuutigalugu.

Aallaqqaasiutigalugu erseqqissassavara qimminut qimuttunut tunngatillugu kulturitta taasumalu attattuarnissaa ineriartortittuarnissaalu Naalakkersuisut tamakkiisumik tapersersugarimmassuk. Kalaallit qimmii qimuttut uagut kalaallit kulturitsinnut kinaassutsitsinnullu pingaaruteqartorujussuupput. Nunatsinni qimminik qimuttunik aalisarnermi, piniarnermi takornariaqarnermilu atuisarnerput piorsarsimassuseq eqqarsaatigalugu immikkuullarissutigaarput. Qimusseq avatangiisit eqqarsaatigalugit naapertuunnerpaamik assartuutaavoq.

Tuttunniarnermut tunngatillugu aqutsinermut aalajangiinerit Tuttut nujuartat illersugaanerat piniagaanerallu pillugit Namminersorlutik Oqartussat nalunaarutaat nr. 7, 27. juni 2013-imeersoq naapertorlugu Aalisarnermut Piniarnermullu Naalakkersuisumit akisussaaffigineqarpoq. Taamaasillunilu uumassusilerituut siunnersuisinneqareernerisigut susasaqartullu tusarniarneqareernerisa kingorna pisassat, piffissat piniarfissaritaasussat kiisalu sumiiffiit piniarfiusussat Naalakkersuisumit aalajangersarneqartarput. Tamatuma kingorna pisassat aalajangersarneqarsimasut aallaavigalugit pisassat inuussutissarsiutigalugu sunngiffimmilu piniartunut kommuninit agguaanneqartarput. Nalunaarut siuliani taaneqartoq tunngavigalugu qimmit qimuttut tuttunniarnermi assartuutit atorneqarsinnaanissaannut periarfissaqareerpoq.

Arfersiorfimmi tuttut eqqarsaatigalugit Naternamut tuttoqarfiusutut inissisimasuuvoq, taamaasillunilu sumiiffik tamanna tuttunik aqutsinermut ilaareerluni. Piniarneq aallaaniarnerlu pillugit Inatsisartut inatsisaat nr. 12, 29. Oktober 1999-imeersoq malillugu isumalluutit piujuarnissaat kinguaassiortuarnissaallu kiisalu eqqarsaatigillugaasumik ukiullu qanoq ilinera eqqarsaatigalugu pissarsiffiunerpaasumik iluaquteqarniarnissaaq pingaartineqassapput.

Tuttut pingaartumik ukiukkut piaqqiornerullu nalaani akornusiinermi sunnertiasuupput. Tuttut ukiakkut akornusiinermi sunnertianninnerusarput. Piniarfik Naternami tuttunniarneq piffissaliussat atuuttut naapertorlugit aggustip aallaqqaataani aallartittarpoq sunngiffimmilu piniartunut tunngatillugu septembarip 30-at ilanngullugu ingerlanneqartarluni inuussutissarsiutigalugulu piniartunut oktobarip 15-at ilanngullugu ingerlanneqartarluni.

Tuttunniarnermut aqutsinermut atatillugu ukiuunerani piniarnissaq aqutsinermi immikkut sakkussatut aatsaat tutut piniarfimmi pineqartumi amerlivallaalersimatillugit atorneqartarnissaa tunngaviusumik periusaavoq.

Taamaattumik piniarfimmi uumasut nerisassaqarniernerat aallaavigalugu uumasut ikilisarneqartariaqalersillugit aatsaat ukiuunerani piniarnissaq ingerlanneqartarpoq. Pinngortitaleriffik naapertorlugu Naternami tutut immikkut ikilisarneqartariaqarnissaat pisariaqanngitsoq nalilerpaat. Naalakkersuisoqarfimmiit piniartut ilisimasaannik piffimmi pineqartumi ukiuunerani tutunniarneq pillugu tigusaqarnikuunngilaq. Tamannalu isumaqarpoq, maannakkut ukiuunerani tutunniartoqassanngitsoq. Taamaattoqassagaluarpat qimussimik tutunniarsinnaaneq periarfissaassalluni.

Siunnersuuteqartup siunnersuummini piniarfinni eqqaaniittuni ukiuunerani piniartoqarta-reerpera eqqaavaa. Aqutsiveqarfinni Kangaatsiaq-mi aamma Naternaq-mi periarfissaqartoq ukiuunerani umimmanniartoqarsinnaanera ilumoorpoq. Taakkuli tassaapput aasaanerani ukiaanerani umimmattassiissutit "Sisimiut"-ni pisarineqanngitsoorsimasat januarip 30-aniit februarip 26-at ilanngullugu ukiuuneranut nuussat, aammalu aasaanerani ukiaanerani umimmattassiissutaasimasut umimmaqarfik Naternaq-miit ukiuunerani februarip 13-ianiit marsip aqqaneq aappaat ilanngullugu nuunneqarsinnaasut, pisassiissutit sinneqarsimappata. Tamannali aasaanerani ukiaanerani piniartarnerit ukiuunerani piniartarnerit akuleriissilerneratigut taamaallaat anguneqarsinnaasoq. Kommunit susassaqartut suleqatigalugit pisarinngitsuukkat amerlassusaat naatsorsorneqartarput, pisanut nalunaarutit tunngavigalugit.

Taamatut oqaaseqarlunga Naalakkersuisut tunngavilersuutit siuliiniittut aallaavigalugit siunnersuutip itigartinneqarnissaa inassutigaa.